

DISSERTATIO PHYSICA
DE
EXTENSIONE
CORPORUM

CUJUS
PORTIONEM PRIOREM

PRÆSIDE

JAC. LUDOV. SCHURER

PHYS. PROF. P. O.

AD DIEM XVIII. JANUARIi MDCCLXX.

SOLENNI ERUDITORUM EXAMINI

SUBMITTIT

JACOBUS FRIDERICUS KOLB

Argentinenſis.

AUCTOR

H. L. Q. C.



ARGENTORATI, Imprimebatur IN OFFICINA KÜRSNERIANA.

COLLEGII WILHELMITANI
P R Æ F E C T I S

MUNIFICENTISSIMIS,

V I R O

MAGNIFICO, CONSULTISSIMO,
AMPLISSIMO,

D. JOH. DANIELI SCHMID,

REGIÆ CIVITATIS ARGENTORATENSIS

TREDECIMVIRO SPLENDISSIMO,

V I R O

CONSULTISSIMO, AMPLISSIMO,
PRUDENTISSIMO,

D. ELIÆ BRACKENHOFFER,

REGIÆ CIVITATIS ARGENTORATENSIS

QUINDECIMVIRO GRAVISSIMO,

NEC NON

AMPLISSIMIS ET VENERANDIS

COLLEGII WILHELMITANI

V I S I T A T O R I B U S

A T Q U E

I N S P E C T O R I,

PATRONIS ET BENEFACTORIBUS,

PIE COLENDIS

HAS STUDIORUM SUORUM PRIMITIAS

GRATA MENTE MERITO DICAT

JAC. FRID. KOLB.



§. I.



Res naturales extensæ, solidæ, mobiles, resistentes *Corpora* vocantur, horumque congeries cum interfuso spatio *universum* constituit. Quidquid Corporibus inest & sensuum ope in iis detegitur; *Proprietatum* nomine venit. Harum aliæ quibuscunque Corporibus perpetuo competunt, & attributa eorum nominantur. Huc *Extensio* & quæ exinde sequuntur *divisibilitas* & *figuratio* pertinent. Huc *soliditas* (sive, ut ab aliis vocatur) *impenetrabilitas*, præterea *mobilitas*, *quiescendi facultas*, *inertia* referendæ sunt. (a) Præter hæc communia Corporum attributa aliæ dantur qualitates, quæ a rebus naturalibus adesse, vel abesse possunt, salva Corporum essentia, & acci-

dentia vocantur huc : *firmum & fluidum, siccum & humidum, calidum & frigidum, pellucidum & opacum, sonorum & non sonorum, durum, molle elasticum, compressibile & non compressibile & plures aliæ qualitates sensibiles* (b) pertinent. Omnes hæ proprietates, uti etiam cæteri Corporum situs, motus, mutationes, effectus, qui sub generali *Phænomenorum* naturalium titulo veniunt, sola sensuum ope cognoscuntur (c) & ad animum quasi devolvuntur. Observantur præterea *Virium* in Corpora naturalia effectus, qui sunt motus conservatus, productus, alteratus, destructus. Harum virium aliæ omni tempore corporibus insunt, & *Vires insitæ* vocantur, quo *Vis inertiae* & exinde dependens *Resistentia* pertinet. Reliquæ *Vires* Corporibus *impressæ* sunt, quarum aliæ omnia corpora perpetuo & massæ proportionatim vel sollicitant vel agitant, quo *gravitas, attractio & repulsio* referendæ sunt. Aliæ uti *Electricitas, Magnetismus, Calor, Frigus, Ventus, Elasticitas* aliæque non semper in Corporibus operantur, sed tum demum agunt, quando Corpora contigua vel se mutuo premunt vel se mutuo percutiunt. Aliæ in organismo Corporum utcunque viventium observantur, quo *Vegetatio, Nutritio, Irritabilitas, Sensibilitas* pertinent. Omnes hæ *Vires* non libere in Corpora, sed juxta certas & constantes regulas, quæ *Naturæ Leges* vocantur, agunt; ita ut certi motus semper & in omnibus occasionibus generentur. (d) Harum legum viriumque primitivarum causæ & principia a sola Dei voluntate dependentes ignorantur.

(a) Cl. DE TURRE attributa Corporum in *primaria & secundaria* distribuit. Adea Extensionem, Resistentiam, Mobilitatem; ad hæc Figurationem, Impenetrabilitatem, Divisibilitatem, Motum refert. Vide *Elem. Phys.* T. I. Sect. I. cap. 1. §. 7. p. 24.

(b) Inter accidentia dantur quædam, quæ in multis Corporum generibus reperiuntur. Ita *porositas* in omnibus Corporibus compositis, quæ sensibili mole gaudent, reperitur. Ita *motu* violento & rapido solis & planetarum cometarumque moles agitantur. *Electricitas*, *Facultas Ignem lucemque libendi & diffundendi*, in omnibus fere Corporibus sensibilibus excitari potest. Vide MUSCHENBR. *Introd. ad Phil. Nat.* T. I. §. 48.

(c) Omnia quæ in Corporibus sponte se offerunt, animadvertentes, *observare* dicimur. Si vero Corpora ope Instrumentorum explorantur, & talia nobis offerunt spectacula, quæ sponte nunquam apparuissent, *Experimenta instituimus*. Uti veteres Physici observando, ita Recentiores abhinc duobus sæculis experimentando præcipue eminuerunt, & multa veteribus incognita detexerunt. Confirmant hoc plurima ex Magneticis & Electricis Phænomenis & multa, quæ gravitatem, attractionem & lucis refrangibilitatem, oscillationem pendulorum &c. spectant. Vid. D'ALEMBERT, T. IV. *Mélanges de Litterature*. Elem. de Philos. p. 215.

(d) (e. gr.) 1) Omne Corpus perseverat in statu suo quietis vel motus uniformis & directi, nisi quatenus a viribus impressis cogatur statum suum mutare. 2) Omnis mutatio sequitur proportionem virium impressarum, & fit juxta directionem harum virium. 3) Omnis actio reactioni æqualis. NEWTON *Princ. Philos. Nat. Mathem.* p. 17. 4) Omnia Corpora in se mutuo gravitant. S'GRAVESANDE *Phys. Elem. Mathem.* T. II. p. 878. §. 404. 5) Lex Refrangibilitatis lucis. NEWTON *Opt.* p. 300. 6) Lex harmoniæ tonorum. RAMEAU cap. 1. harmon.

§. II.

Primum, quod omnibus in corporibus sensuum ope distinguimus, est eorum *Extensio*. Omne enim corpus, quamcunque etiam magnitudinem habeat, cujuscunque sit densitatis & cohærentiæ, longitudinem habet, superficie & crassitudine gaudet: in quo autem

Natura Extensionis posita sit, Philosophi definire non potuerunt.

I. Corpora, quæ nudis oculis perspicimus, vel quæ tangendo premendoque observamus, Extensione in longum, latum & profundum gaudere, quotidiana confirmant Phænomena.

Nec dubium est, subtilissimas fluidorum tenuium moleculas similem Extensionem possidere. Ignis enim omnia, quæ in sensus veniunt, corpora distendit & rarefecit. Luce a corporibus reflexa, vel ex iis emanante magnitudinem objectorum extra nos positorum percipimus. Aër ex variis corporibus, quæ calefacta sunt, aut quæ motibus intestinis agitantur, aut minore atmosphæræ pondere premuntur, sub bullarum forma ascendit. Præterea illæ moleculæ, quæ nudo oculo veluti puncta sine sensibili longitudine, vel linearum instar, sine sensibili latitudine, vel lamellarum specie sine notabili crassitie apparent, si microscopio, objecta valde amplificante, conspiciuntur, in omnes tres dimensiones extensæ videntur.

Ex his observationibus aliquas saltem hic apposui:

I°. Ranae vivæ mesenterium, quod valde pellucidum est, supra foramen rotundum, tabellæ lignæ insculptum, expandatur; si nudo oculo consideratur, tum quidem tubulos nobis ostendit, in quibus tamen motus fluidi contenti progressivus non observatur. Si vero Microscopio Cussiano objecta valde amplificanti mesenterium subjicitur, in eo plures apparent canaliculi, in quibus moleculæ rubræ, flavæ & aliæ coloris omnis expertes, atque limpidæ varie inter se invicem commixtæ & convolutæ moventur. Inter hæc vascula alia sunt, quæ super alia procurrunt, alia ad aliorum latera pergunt, alia minora, in canales majores confluunt, alia in plures ramulos dividuntur, qui variis anastomosibus juncti retia vasculorum efficiunt; aliqua etiam horum vasorum in ipsa mesenterii tunica obscuris finibus desinunt. Quædam sub angulis valde obtusis ipsa intestinula adeunt. In pluribus, quæ sine dubio ad arterias pertinent, pulsum aliquem sensibilem observavimus. In aliis particulæ illæ flavescentes & limpidæ solitarie volvuntur, & quæ in vasculis angustissimis spiriformibus agitantur, ellipticam figuram accipiunt, ut figura motus legibus consentanea, axis earum major juxta


canaliculi ductum; axis autem earum minor secundum vasculi diametrum disponatur. Quando animalis vires deficiunt, languet sanguinis humorumque motus, qui tamen intenditur, si spongia aqua calida uel mesenterium tangitur, & ita stimulo addito vis solidorum vitalis refocillatur. Inter moleculas, quæ in tubulis illis moventur, sunt, quæ lente microscopica lineæ longitudinem centies augente conspectæ, tertiam circiter lineæ partem apparente diametro attingunt, atque hinc earum diameter, qui nudo oculo mensurari possit, $\frac{1}{300}$ lineæ æquat. Si igitur, uti Geometræ demonstrant, sphærarum soliditates sunt, uti cubi diametrorum, talis molecula esset $\frac{1}{27,000,000}$ ejus sphæræ, quam compleret aquæ gutta, cujus diameter est unius lineæ.

2°. Insectum aliquod parvulum, cujus longitudo lineam non excedit, inter duas lenticulas parum concavas includatur, & ope microscopii solaris imago objecti in plano albo repræsentatur, quod ab objecto 12 pedibus distat. Lente objectiva utimur, cujus focus 2 lineas non excedit.

Imago animalculi longitudinem 5 pedum cum semisse, latitudinem vere mediam duorum pedum trium pollicum accipit. Motus etiam ventriculi peristalticus evidentissime apparet, præsertim si insecti cuticula translucet, & uti SWAMERDAM. *Bibl. Nat.* T. I. p. 77 de pediculo notavit, recens acceptum alimentum, cum quibusdam succorum reliquiis commixtum in omnes ventriculi plagas concutitur & commoveatur.

Distinguiamus etiam ad latera capitis duo hemisphæria, quæ animalculi oculi sunt, & diametrum 6 pollicum habent, licet oculo nudo conspecta vix quartam lineæ partem longitudine attingant. Soliditas ergo hujus sphæraulæ nudo oculo conspectæ est ad soliditatem sphæraulæ, qualis microscopio apparet, uti unitas ad cubum numeri 288, vel uti 1 : 23887872. Verum nec illæ partes sunt minutissimæ. Transpirat insectum ardore solis fotum, & circum circa magna sudoris copia circumcingitur. Guttulæ minores in majores confluunt: & cum radios lucis diversimode refrangibiles transmittant, ipsos in transitu ita sejungunt, ut colores iridis nobis ostendant.

3°. Argenti purissimi grana 30 cum granis argenti vivi 15 coagulata, in uncia aquæ fortis dimidia dissolvantur. Limpidæ



solutionis guttula, cujus diameter sit sesquilineæ, vitro parum concavo imponatur, eique tenue fili ænei frustulum injiciatur; oritur effervescentia, aër cum sibilo sub forma punctorum albicantium ejicitur, quæ in suprema guttæ superficie evanescentia cum reliquo aëre confunduntur. Eroditur æs & liquor viridi colore imbitur. Ex solutione ejiciuntur tenuia argenti ramenta, quæ tunc ad fundum guttæ præcipitata circa fili reliquias in rotundum disponuntur, & quam plurimos furculos argenti varie sibi mutuo intertextos repræsentant.

Omnia hæc evidentius & elegantius observantur, si microscopio utimur. Lineolæ enim & striæ argenteæ in nitidissima arbutula expanduntur, quæ quidem in ramos eo tenuiores explicantur, quo magis ab ære præcipitante distant. Ramuli hi omnes, quando magna lucis copia illustrantur, crystallorum instar limpidi sunt, & eorum extremitatibus globuli adhærent, fructus quasi & folia repræsentantes. Si vero debiliorem lucem ad oculos reflectant, furculi argenteo colore nitide lucent, & quasi tot frutices nive textas simulant.


4° Elegans etiam est argenti in aqua forti soluti præcipitatio, si loco æris tenuissimum ferri filum solutioni injicitur. Argentum sub innumerorum ramulorum nigricantium forma ex solutione ejicitur, quod ut eo evidentius fiat, acidum primo partibus duabus vel tribus aquæ pluvie admixtis infringendum est: alias enim, quoniam ferrum facillime in aqua forti dissolvitur, rami argenti inter se invicem confunduntur, nigredine ferri obvolvuntur, & desiderata figuræ elegantia orbantur: Vide de his Experimentis Chémico-Physicis, quæ sub generali nomine *Vegetationum Philosophicarum* veniunt, tractatum Cl. CONDAMINE *Memoires de l'Acad. R. des Sciences de Par.* 1731. pag. 65 sqq. insertum.

5° Pulvis, qui alis Papilionum insidet objectiva Microscopii Cuffiani lente consideratus, quæ adjuvantibus ocularibus objecti diametrum 248lies amplificat, oculo armato pennularum figuram offert, quæ in superiori limbo aliquoties incisæ, in media superficie sex vel septem striis oblongis versus infimum marginem convergentibus divisæ sunt. Ad hunc marginem parum convexum pennulæ in brevem tubulum desinunt, eoque alæ inseruntur.

II. Extensionis idea semper menti præsens simplicissima est. Verbis ergo describi non potest, uti S'GRAVESANDE in *Phys. Elementis Mathemat.* L. I. cap. 11. §. 12. indicavit. Fuerunt tamen alii Philosophi, qui Extensionem illud vocaverunt, quod partes extra partes positas habet: non tamen ii attendisse videntur, partes illas, ex quibus Extensio composita est, æque esse extensas, ac totum, quod sua continuitate absolvunt. Neque accuratior videtur SCARELLÆ definitio, quam de Extensione *Phys. General.* L. I. part. 1. C. 1. §. 3. proposuit. “Extensam quantitatem eam vocat, cujus partes vel in loco sunt simul, & in uno eodemque tempore, vel alia juxta aliam, ita ut jugiter fluant, & aliæ intereant, dum aliæ nascantur.” Quæ enim in loco sunt, siue nunc in eodem permaneant, siue alium successive impleant, necessario extensæ sunt, uti ipse fatetur.

§. III.

Licet Extensio inter generalia rerum naturalium attributa omnino primum sit, non tamen Corporum naturam sola absolvit; alias enim una materia totum mundum sine interruptione occuparet, vel quia resistantia quantitati materiæ semper proportionata a Corporea re quacunque, quamvis exilissima, nunquam separatur, subito de motu omni actum esset, cum locus, in quem partes cedant, non detur. Præterea ex sola Extensione alia Rerum Naturalium attributa, Resistentia, Mobilitas, Gravitas, Attractio derivari nequeunt. Denique ex eo, quod Extensio primum poni possit, quod cum Corporis Idea jungatur, ultimumque, quo ex mente quasi expulso, Corporis etiam Idea evanescat, nondum sequitur, in Extensione Naturam Corpoream collocandam esse, quoniam aliter cogitationes nostras dirigendo, circa quodcunque aliud Corporis attributum simile ratiocinium valet. *




I. Naturæ significationem variæ & apud Philosophos & Medicos & in vulgo acceptam fuisse, jam olim GALENUS Comment. II. ad Hippocr. Aphor. nr. 34. MUNDELLA in theatro Galenico sub titulo Naturæ & BOYLE in tractatu de ipsa Natura exposuerunt.

In eo tamen omnes conveniunt Philosophi, quod Natura Corporum generale aliquod principium sit, à quo motus eorum omnes, mutationes & effectus dependent, quoque posito, Corpora ponantur, quo sublato, corpora tollantur. Verum in quo Principium illud ponendum sit, Philosophi non consentiunt. Alii enim, referente CICERONE L. II. de Natura Deorum Cap. 32. "Naturam censent vim quandam „ sine ratione cientem motus in corpore necessarios; alii „ autem vim participem rationis atque ordinis, cujus sol- „ lertiam nulla ars, nulla manus, nemo artifex consequi „ possit imitando; sunt autem, qui omnia naturæ nomine „ appellent, ut Epicurus, qui ita dividit, omnium, quæ sunt, „ naturam, esse corpora, & inane, quæque his accidant. „ Stoici præterea Naturam mundo inesse & præesse hujusque partes Natura administrari, arbitrati sunt: teste SENECA Natural. Question. L. II. C. 45.

Scholastici etiam Philosophi Naturam barbaris vocabulis in *Nurantem* & *Nuratam* dividentes, illam quidem Deum nominarunt, hanc autem potentiam aliquam Dei sociam ab ipso creatam & non sine consilio operantem habuerunt. Hinc non passivum tantum, sed activum etiam motus principium naturam vocarunt. Vide ZABARELLA de reb. natural. in Libr. de Natur. cap. 6. p. 240. Inde Vulgares eorum theses: *Naturam nil facere frustra. Naturam à vacuo abhorrere.* &c. Vid. STURM. Phys. Elect. Tom. I. p. 148.

Alii Naturam mundi animam vocaverunt, & in nupero sæculo HENRICUS MORUS Anglus Principium aliquod Deo subordinatum Naturam vocavit, cujus actioni omnia universi phænomena attribuit, illudque principium *Hylarchicum* nominavit, quod a STURMIO in singulari tractatu sub finem *collegii curiosi* addito exanimatum fuit. Huc forsan spiritus ille universalis spectat, quem NEWTONUS commune attractionis & gravitatis principium suspicatus est, quo brevissimis in

Scholio ad finem *Principiorum Philosophiæ Naturalis Mathematicorum* agit. Alii Phœnomena Naturæ a viribus corporum plasticis derivarunt, quæ in universo singulas materiæ partes ad producenda Phœnomena naturalia dirigant, & plantas & animalia disponant, ut generatim secla propagent; quales olim a PLATONE, inter recentiores autem a MALLEBRANCHE, RAJO, CUDWORTHIO, aliisque defensæ fuerunt. Alii Naturam Corporum, ut LEIBNITZ, BOSCOWICH, BUFFON, NEEDHAM in viribus quibusdam primitivis a Deo materiæ infusis derivarunt. Non tamen in eo consentire videntur, in quonam vis illa primitiva sit constituenda. LEIBNIZIUS suam de Natura sententiam in tractatu *de motu abstracto* atque postea in *Specimine Dynamico pro admirandis Naturæ legibus Actis Erud. Lips. 1695. Appl. p. 45.* proposuit. atque omnem Naturæ actionem a vi MONADUM derivavit. Sub quo nomine entia simplicia activis viribus prædita intellexit, & e quibus omnem Materiam Corpoream composuit. BOSCOWICH, prima corporum principia in punctis individuis & non extensis ponens, dixit, hæc aliquo semper intervallo sejungi per vim aliquam ipsis primitus infusam. Quæ vis cum juxta ejus sententiam in minimis etiam distantis conatum aliquem à se mutuo recedendi punctis istis imprimat, ab ipso *Vis repulsiva* vocata fuit. Supposuit porro Vim eam distantis in infinitum diminutis, ultra limites qualescunque augeri: auctis autem distantis continuo diminui, donec penitus evanescat, & in determinationem accedendi transeat, quam *vim attractivam* salutat. Tandem addit, hanc vim attractivam augeri primum, tunc decrescere & in repulsivam iterum converti, donec post varias reciprocaes Vis attractiva in magnis distantis in ratione reciproca quadratorum distantiarum sese habeat. Vid. *Dissert. de Virib. Vivis* §. 42. sqq. 3^o parti II. Tomi *Comment. Instit. Bonon.* insertam. & *dissert. de Leg. continuitatis* §. 159 & 165. Cl. BUFFON: Naturam Immensam aliquam vim esse censuit, omnia corpora amplectentem, omnia animantem & nonnisi Deo jubente aut consentiente agentem. Audiamus sublimia facundissimi Philosophi verba. “ Le temps, l’espace & la „ matiere sont les moyens de la Nature, l’univers est son ob- „ jet, le mouvement & la vie son but. Les effets de cette „ Puissance sont les Phénomènes du Monde, les ressorts, „ qu’elle emploie, sont des Forces Vives, que l’espace & le



temps ne peuvent que mesurer & limiter, sans jamais les détruire; des forces, qui se balancent, qui se confondent, qui s'opposent sans pouvoir s'anéantir; les unes pénètrent & transportent les corps; les autres les chauffent & les animent; l'attraction & l'impulsion sont les deux principaux instrumens de l'action de cette puissance sur les corps bruts; la chaleur & les molécules organiques vivantes sont les principes actifs, qu'elle met en œuvre pour la formation & le développement des êtres organisés. Vid. *Discours sur la Nature* Tom. XXIV. *Hist. Nat.* præmissum, NEEDHAMUS autem ex observationibus suis microscopis, quas vel solitaria, vel conjuncta cum BUFFONO opera fecit, concludit, Naturam in duabus viribus consistere, quarum unam *expansivam* alteram *resistentem* vocavit. Has duas vires non in omni materiæ molecula æquabili in ratione inesse & cum hæ vires ex mutuis actionis & reactionis elementorum rationibus producantur, relative & non absolute Materiæ inhærere ratus est; ita prouti vel vis resistens expansivam superet, *inertem* materiam generet, vel si expansiva vis præ resistente emineat, pro varia illius intentione; vel *planta*, vel *Zoophyta*, vel *animalia* producantur, per varias itaque scalas ex minus perfecta ad magis perfectas species progressus fiat, & reciproce. Resistentiam itaque Motum & sensationem, effectus causarum simplicium diversimode combinatorum, esse credidit. Vide NEEDHAM *nouvelles observ. Microscop.* p. 320. sq. & DE TORRE *Phys.* T. III. Lect. I. Cap. V. 462. sqq.

Interim singulares hæ de Natura rerum inter Philosophos quamvis acutissimos discordiæ nobis evidenter ostendunt, hanc potentiam, uti cæteras rerum corporearum, vires ex earum effectibus solummodo cognitam esse, principium autem ipsum, sive causam primitivam perpetuis tenebris involvi, atque ita Naturam rerum corporearum ignorari. Si præterea in Essentiam Corporum particularium inquiramus, neque scimus, quid faciat, cur aurum sit aurum, aqua sit aqua & non aliud corpus. Ignoramus enim, unde auri ductilitas & densitas dependeat, cur aqua in minus spatium comprimi non possit; unde ejus pelluciditas & densitas generentur. Vid. alia similia exempla apud BOYLE in *tractatu de excellentia Theologiæ cum Physica* collatæ.

II. CARTESIUS & qui eum sequuntur, Physici materiæ Naturam in Extensione posuerunt. “ Natura materiæ (ait in „ *Princip. Philos.* part. II. §. 4.) non consistit in eo, quod sit „ res dura vel ponderosa, vel colorata, vel alio quocunque „ modo sensus afficiens, sed tantum in eo, quod sit extensa „ in longum, latum & profundum. „

Verum si in Extensione Corporum Natura poni debeat, tum quidem, ut primum Extensio ponitur, simul etiam Corpus ponendum esset: Ergo intervallum inter duo Corpora interceptum, corpus esset, nulla in hoc mundo corporum interruptio daretur, & una materia omnia universi spatia impleret, quod ipse CARTESIUS fatetur l. c. §. 22. Sed ita motus, a quo tamen omnem formarum corporearum varietatem §. 23 derivavit, a materia exularet; in quemnam enim locum pars materiæ cedat, qui non alia simili jam parte repletus sit? Quomodo lux immensa cœli spatia tam rapida uniformitate percurrere possit, ut intra minutum secundum 35000 milliaria Germanica absolvat, si per medii vel rarissimi resistantiam impediretur, cum hæc quidem eo major reperiatur, quo major est velocitas, qua per medium agitur. Perennes Planetarum cursus & perpetui cum admirabili incredibilique motuum constantia jamdiu destructi fuissent; si omni momento contra medii resistantiam vires Corporibus illis ingentibus impressæ luctarentur.

Per NEWTONI autem demonstrationes primum patuit, medium illud, in quo astra volvuntur, adeo tenue & rarum esse, ut nonnisi per plura sæculorum millia Planetarum motus & velocitates disturbare possit. Neque in spatii hujus vacui per cælos disseminati locum *Gravifica* vel *interlabens* LEIBNIZII & WOLFII materia, vel indefinitæ innumerabilium & subtilissimorum vorticum se mutuo excipientium familiæ substitui possunt, uti MALLEBRANCHE, POLIGNAC, PRIVAT DE MOLIERES alique ex recentioribus Cartesianis fecerunt. Inertia enim & Gravitas corporum absoluta non ab eadem causa dependent, uti fusius Clar. DE TOPPE *Physic. General.* T. I. §. 203. sq. demonstravit; & nullo modo concipi potest, quomodo subtilis materia omnes corporum meatus sine ullo impedimento & sine quadam successione superare possit, ut illud PAULIEN *Diction. de Phys.* T. II. p. 284. sub titulo MILIEUX probavit.

III. Impenetrabilitas (de qua alia occasione fusius agemus) illud est corporum attributum, juxta quod omne corpus Physicum ex loco, quem actu occupat, omne aliud corpus excludit, nisi antea ex loco illo a vi quacunque motrice impressa disturbatum fuerit. Hoc attributum nequaquam sequitur ex sola Extensione, quod MUYS in *Elementis Pyhics* p. 311. sqq. probare nisus est. Mathematici enim uno & in eodem spatio & sphæram, & cylindrum, & cubum, & quodvis aliud solidum cogitant. Si autem vel minimum nobis corpusculum repræsentemus, in uno loco absoluto cum alia simili molecula esse non potest, nisi primum intereat, aut infinitis viribus præditum sit, quarum nullum exemplum in hac rerum Universitate observatur, uti egregie BOSCOWICH parte altera diss. de *Lumine* §. II. monuit.

Quod porro Mobilitatem attinet, nec illa ex Extensionis natura fluit, quoniam cum Extensionis idea non necessario movendi facultas conjuncta sit, & extensum æque bene quiescere ac moveri possit.

Porro quomodo in meram & continuam Extensionem actio aliqua exerceri queat, nullo modo patet, quia spatium per se immobile & immutabile nec agere, nec pati ullo modo potest. Denique propter eandem rationem nec Gravititas, nec Attractio, nec Inertia ex sola Extensione deduci possunt.

* Hoc argumento usus est MUSCHENBROECKIUS *Introd. ad Philos. Nat.* T. I. §. 135. ut probet in Extensione naturam Corporum poni non posse. „ Corpus (ait) manui imponatur, clausis oculis sentimus corpus, quia manum gravitate „ deprimit, jam cum Mechanicis totam gravitatem ad Centrum corporis sese recipere fingamus, & conceptu proprietatibus omnibus de hoc corpore remotis, solo centro gravitatis excepto, ideam corporis eandem retinebimus, cum „ manus æque ac antea deprimatur, adeo ut ultimum ac „ primum, quod in corpore observamus, gravitas esset, qua „ sublata Corporis Idea periret, qua posita Corporis Idea „ poneretur. Sed nemo Naturam Corporum in gravitate positam esse, affirmare poterit, cum ex Gravitate nec Extensio, „ nec Impenetrabilitas, nec Inertia fluant. Ergo etiam in Extensione Natura Corporum poni non potest. „

§. IV.

Omnis Extensio quantitas est; atque propterea Corpus, ut cogitatione ultra omnes assignandos fines augeri, ita etiam mente in parvitatem infinitam usque diminui dividique potest. Ad quam cunque enim parvitatem continua mentis abstractione Extensio diminuat, nulla adest ratio, cur ulterius diminui non possit. Corpus igitur tanquam mera Extensio consideratum in infinitum dividuum est, & *divisibilitas* ad generalia corporum attributa hoc in sensu pertinet.


I. Quantitas, quatenus ad Corporis Extensionem spectat, dupliciter considerari potest, Geometrice & Physice. Geometræ Extensi dimensiones, proprietates & figuram, earumque vel similitudines vel dissimilitudines, vel æqualitatem vel inæqualitatem considerant. Ita abstrahendo ab omnibus aliis affectionibus, quæ Corpori competunt, in ea inquirunt, quæ ad longitudinem pertinent, sive nunc illa longitudo per brevissimum unius puncti ad alterum transitum, sive per aliam quamcunque via brevissima majorem denotetur; hinc affectiones primo linearum rectarum & curvarum exponunt.

Considerant deinde spatia lineis sive rectis sive curvis clausa & superficierum figuras vel æquales vel inæquales, vel similes vel dissimiles.

Tandem etiam spatia examinant solida, spuerficiebus sive planis, sive curvis terminata. Geometræ præterea extensa seu continuas quantitates considerant, & terminos earum atque in ea, quæ inter terminos comprehenduntur, inquirunt, uti ARISTOTELES in *Libro de Categoriis* cap. VI. indicavit. Ita ex. gr. nullam lineam sive rectam, sive curvam, cujusvis sit longitudinis, cogitare possumus, ut non simul etiam puncta assumamus, inter quæ longitudo illa contenta sit. Porro nullam aream vel planam vel curvam menti proponere possumus, ut non simul lineas cogitemus, quibus area illa inclusa sit: Nullum tandem solidum animo repræsentari potest, ut non simul superficies & distantiam super-

ficerum, hoc est, crassitiem aliquam cogitemus. Termini quidem ipsi sunt individui. In puncto enim a longitudine; in linea a latitudine, in superficie ab omni crassitie abstrahimus. Sed quæ inter illos terminos comprehenduntur, modo magis, modo minus secundum omnem determinationem à se mutuo distare possunt; necessario igitur in infinitum augeri possunt & in infinitum dividua sunt. Quomodo autem infiniti conceptus formari possit, deinde annotabimus. Si vero Extensionem Physicam nobis repræsentamus, tum quidem in ea non amplius dimensiones diversas separatim cogitare licet, sed omne Extensum Physicum triplicis est dimensionis, in longum nempe, latum & profundum.

II. Quod infinitum attinet, varia hujus vocis apud Philosophos significatio occurrit pro diverso aspectu, sub quo quantitates consideraverunt, & pro diversis magnitudinum speciebus, in quibus infinitas quædam admitti potest. Nolumus hic veterum de infinito sententias afferre, quas olim jamjam ARISTOTELES *Phys. Libr. 3. cap. IV. sqq.* rimatus est, neque etiam Scholarum distinctiones, quas de infinito dederunt, adjiciemus, quas CHAUVINUS in *Lex Phil.* sub titulo *infiniti* exposuit. Notamus hic saltem, aliqua infinitum Mathematicum & Physicum spectantia. Quod quidem absolute infinitum attinet, de eo sermonem non facimus, cum enim ultra omnem comparisonem versetur, de illo etiam notio clara formari nequit. Quod vero relativa infinita attinet, eorum conceptus ex comparatione quantitatum, duarum vel plurium oritur, quarum ratio quantitate utcumque finita exprimi non potest. Nascuntur itaque innumeræ talium infinitorum familiæ, quæ ex relatione cum termino quodam finito originem duxisse videntur, sint nunc eæ quantitates quacunque finita majores, sint tali minores. Optime igitur Cl. D'ALEMBERT proposuit, infinitum supposititium finiti terminum esse, ad quem quantitas quædam continuo quidem accedit, quem tamen attingere nullo modo valet, atque infinita illa potius *indefinita* dicenda esse. Vide Cl. viri *Mélanges de Litterat. T. V. p. 240.* Huic principio innituntur omnia, quæ rectificationes curvarum & quadraturas spatiorum curvilineorum, theoriam quantitatum incommensurabilium, & serierum infinitarum, calculum differentialem & integralem spectant. Quæquidem



hic pro meritis exponi non possunt, & in tractatu Cl. SAVERIEN *du progrès de l'esprit humain dans les sciences exactes*, & adhuc fufius in Cl. MONTUCLA *historia Matheseos* descripta fuerunt.

III. Quod autem infinitum attinet, quatenus Physicam spectat, eodem modo, ut Mathematici, infinitum illud vocant, quod indefinitum & indeterminabile est. Ita in quacunque molecula, quatenus extensa sit, indefinitam numero particularum copiam cogitare licet, quarum una semper altera continuo minor sit, quarumque ultima saltem supposititia nulla assignanda quantitate exprimi possit. Itaque exinde jure derivamus, divisionem, qualis mente peragatur, indefinitam in Corpore obtineri. Alius etiam est infiniti usus in Physicis, ut Virium Corporibus impressarum mensuræ aliquomodo exprimi possint. Conferendo e. gr. effectum pressionis instantaneæ, quam corpus gravitate sua absoluta contra obstaculum quodlibet exercet, cum effectu ponderis per datum tempus finitum (per minutum secundum) labentis, ille respectu hujus infinite, hoc est, indefinite parvus est: vis enim pressionem superat, quantum tempus finitum momentum indefinite exiguum excedit. Quoniam quot temporis momenta minima in unominuto secundo concipi licet, tot hoc in casu dentur continuæ pressionum sibi mutuo succedentium plagæ. Si præterea ad curvas attendimus, in quibus ex combinatione virium componentium Planetæ tum primarii tum secundarii retinentur, tum quidem a Curvis regularibus & Geometricis, ad quascunque nunc Coni sectiones pertineant, plus, minus aberrant, ut Cl. D'ALEMBERT *Mélanges de Litt.* T. IV. pag. 157. observat. Denique si innumeras figurarum rerum naturalium vicissitudines, & indefinitas, quæ in corporum densitate & raritate occurrunt, differentias contemplamur, quanti sit usus infinitum Mathematicum in Physicis, evidentissime patet.

§. V.

Quando autem cujusvis dimensionis Extensio mente continuo dividitur, tandem ad particulas pervenitur,
C

quæ adeo exiles sunt, ut aliis finitis ejusdem generis quantitativibus additæ vel detractæ, magnitudinem earum ad sensum nec augeant, nec diminuunt, atque respectu finitarum quantitatum, quibuscum comparantur, evanescentes, pro nihilo earum respectu haberi possint; quamvis hæc quantitates indefinite parvæ per numeros finitos multiplicatæ vel divisæ inter se invicem differant.

- I. Quicquid alterius respectu indefinite parvum est, illud quidem finiti valorem & molem sensibilibiter alterare non potest: finita enim quantitas respectu indefinite parvæ ultra omnes comparationis limites magna est. Ut hæc eo melius intelligantur, aliqua exempla proponamus.

Geometræ nimirum rectas lineas, quæ ad certam aliquam curvam referuntur, in constantes & variabiles distinguunt. Illæ quidem in eadem curva neque augmenti, neque decrementi capaces sunt, atque hinc fixum valorem habent. Ita in Circulo radius; in Ellipsi axis major eique conjugatus axis, omnesque lineæ ad curvas varias ductæ, omnium maximæ vel minimæ, constantes sunt. Inconstantes autem lineæ magnitudine variare possunt, neque propter hanc rationem curva alteratur, ad quam lineæ illæ variabiles referuntur, aut spatium, quod intra ipsam curvam continetur. Ita de circuli diametro major minorve portio abscindi potest, atque a quocunque diametri puncto ad circumferentiam perpendiculares elevari possunt omni momento variabiles: si igitur duæ tales abscissæ, vel applicatæ sibi invicem indefinite proxime supponuntur, tum quidem quantitate indefinite parva differunt, quæ lineolæ differentialia dicuntur; ita ut, si abscissa x & differentiale ejusdem dx , applicata y hujusque differentiale dy appellentur, x a quantitate $x \pm dx$, & y ab $y \pm dy$ sensibilibiter non differant. Neque etiam magis sensibilis est differentia inter $y \pm 3 dy$ quam inter $y \pm dy$, quoniam æque ac antea ratio inter y & $y \pm 3 dy$ exprimi non potest.

Interim notandum est, licet hæc differentiales quantitates respectu linearum finitarum, quibuscum comparantur, nihilo æquales sine errore poni possint; inter se invicem tamen

differre & finitam inter se mutuo rationem habere. Nonne enim $1\ dx : 2\ dx : 3\ dx \&c. :: 1 : 2 : 3 \&c?$ Hæc quantitas variabilium & constantium theoria in Physicis magni est usus. Ea enim præcipue utendum est, ut natura variarum curvarum, quas motu corpora describunt, eo curatius determinari possit. Hoc calculo opus est, ut Theoria motuum, circa quamcunque legem continuo variabilium, eo clarius explicetur. Eodem utuntur in Mechanicis, ut quibusnam sub conditionibus maximus effectus a Vi Machinæ cuidam applicata, sperari possit, determinent. Deinde ad Corporum gravium descensum & pendulorum vibrationes definiendas commodè applicatur. Per observationes enim a RICHERIO, NEWTONO, CELSIO & a magnis Mathematicis in Lapponiam & in Peruanum regnum missis, demonstratum est, massas constantis quantitatis in variis terræ superficiei regionibus non pari gravitate gaudere, & cum corpora versus Æquatorem minus gravia sint, quo magis ad Polos accedatur, eo magis gravitatem eorum incrementum. Atque hanc esse causam, cur pendula æque longa apud Æquatorem & Tropicos in eodem tempore minorem oscillationum numerum perficiant, quam apud Polares circulos & apud Polos. Diversas gravitatis rationes, quæ exinde fluunt, DE TORRE in duabus tabulis Tom. I. *Phys. General.* pag. 119. 120. & 349. 350. insertis exhibuit. Cl. etiam BOUGERIIUS *Mém. de l'Acad. R. des Sc.* 1744. p. 295. & CONDAMINE *Mém.* 1745. p. 476. per observationes suas docuerunt, in vallibus & apud maris superficiem idem pendulum plures oscillationes perfecisse, quam in supremis montium Peruanorum cacuminibus. Licet igitur massæ constantes sint, tamen distantiae à centro terræ variabiles inconstantem gravitatis valorem suppeditant. Nec tantum Valores gravitatis absolutæ, sed Valorem etiam Vis acceleratricis simplicis, qua ad centrum terræ elementa gravia feruntur, earumque Pressiones instantaneas differre, ex iisdem observationibus patet. Tandem hæc indefiniti consideratio non sine successu adhibetur, quando exilissimarum molecularum magnitudo cum corporum exinde compositorum mole comparatur. Uti enim quando differentiales a finitis applicatis subtrahuntur, hæc ultimæ non ad sensum minuantur: Ita etiam talibus moleculis a massa quadam ingente avulsis, hujus quantitas ad sensum non alteratur: Si modo ratio, quæ

inter molem compositam & particulas componentes est, numero definito exprimi non possit. Ita si a monte Peruano Chimboraco, cujus altitudo juxta Cl. BOUGERII mensuram *Mém. de l'Acad.* 1744 p. 268. 19302 pedes æquat, plura sabuli grana ventus abripiat, non proinde altitudo ejus sensibilibiter diminuitur. Neque augetur mare aëreum terræ circumfluens, licet ex effervescente liquore plures aëris bulbulæ in atmosphæram ascendant: aut (uti Cl. BONNETI exemplo utamur) sol 10000000ies tellure major pro extremis globulos lucis habet, quorum plura millia simul insectuli oculum intrant, quod acaro 270000000ies minus est. Vide BONNET *Consider. sur les corps organ.* Cap. I. §. 3. Nec tamen hic lucis globulus ultimum est, ultra quod divisio cogitari queat. In illo enim volumine, quod hic globulus implet, alius iterum mundus juxta BONNET supponi potest, sole suo, planetis, vegetabilibus, animalculis gaudens, & inter hæc animalculum, cujus volumen ad magnitudinem hujus mundi supposititii eandem habet rationem, quæ inter hujus mundi extensionem, atque eam mundi, quem nos aspicimus, interest. Et quis finem ita divisionis attinget? Nonne ita ratiocinando plures series particularum cogitantur, quarum limites æque sunt indefiniti, ac elementa, ex quibus singuli earum serierum termini constant.

II. Quamquam autem idealis extensi cujusvis divisio in indefinitum ex his exemplis evidenter deducatur, interim tamen multi ex claris Philosophis olim jamjam contra eos argumentati sunt, qui idealem corporum divisionem in infinitum protrahi posse, rati sunt. Omnia autem, quæ contra divisionem infinitam proposita fuerunt, argumenta vim non habent, nisi quatenus absolute infinite parva assumantur, de quibus nec Mathematici nec Physici agunt, quippe qui nonnisi de definito & de indefinito agunt, & sollicitè relativum ab absoluto distinguunt. Potissima autem eorum argumenta, quæ MUYS *Phys.* p. 106. sqq. MUSCHENBROECK *Phys.* §. 23. DE TORRE *Phys. gener.* T. I. fusius refutaverunt, paucis nunc proponamus:

Primum argumentum est illud, quod olim EPICURUS proposuit, & quod LUCRETIVS L. I. de *rerum natura* versibus 609. & sequentibus expressit.

- - - - *Nisi erit minimum, parvissima quæque
Corpora constabunt ex partibus infinitis :
Quippe ubi dimidiæ partis pars semper habebit
Dimidiam partem, nec res perfiniet illa.
Ergo rerum inter summam minimamque qui esset
Non erit, ut distent ; nam quamvis funditus omnis
Summa sit infinita, tamen parvissima, quæ sunt,
Ex infinitis constabunt partibus æque.*

Summa hujus argumenti hæc est. Si minima molecula in infinitum iterum dividua est, sequitur minimam moleculam & quæ exinde componuntur, magnas moles esse æquales & æque infinitas. Huic argumento respondemus. Dicitur in molecula quacunque supponi posse indefinitam copiam particularum, quarum singulæ exprimendæ essent per fractionem, cujus numerator sit unitas, denominator autem, quantitate omni finito & expressibili major ita, ut non sit $\frac{1}{100}$ aut $\frac{1}{1000}$ aut $\frac{1}{10000}$ &c. moleculæ integræ sed $\frac{1}{\text{infin.}}$ 2) in divisione mentali assequi non licet minimum. Patet enim ex iis, quæ supra diximus, illam parvam moleculam iterum similiter indefinite dividuam esse, hanc iterum, & sic porro. Præterea partes, in quas totum aliquod dividimus, toti, cujus partes sunt, similes sunt. Si pes cubicus dividendus est, partes sunt partes pedis cubici, si linea cubica dividenda est, partes ad lineam cubicam spectant, & ita porro in indefinitum. Divisio ergo corporis in indefinitum, eam absurditatem non involvit, quod particula & totum sint æqualia. Aliud non absimile argumentum a BERNIERIO in *Abrégé de la Philosophie de Gassendi* Tom. II. L. I. cap. 10. propositum fuit, nec ab illo GALILÆANUM abscedit, quod in *dialogo Mechan.* I. Operum Tom. III. p. 24. inserto legitur. *Quod multitudo infinita partium in Extenso finitæ magnitudinis contineri nequeat, & quod infinita magnitudine differre non possint.*

Huic argumento responderunt KEILIIUS Lect. V. p. 310. & MUSCHENBROECKIUS *Essai de Phys.* T. I. §. 23. atque inter alia exempla probarunt, in hyperbola aream, inter curvam & asymptotam, quamvis indefinite protensas, perfecte quadrari posse, & areæ finitæ æqualem esse, uti ante eos jamjam TO-



RICELLIUS in tractatu *de solido hyperbolico* pag. 115. probavit: demonstravit etiam dignus GALILÆO discipulus solidum acutum hyperbolicum infinite longum æquale esse cylindro cuiusdam recto, cujus basis pro diametro habet latus versum sive axin hyperbolæ, & cujus altitudo æqualis est semidiametro basis ipsius acuti solidi. Nos unico saltem exemplo ex analysi deprompto explicabimus, quod finitum per indefinitam ferri exprimi possit, quo exemplo eo lubentius utimur, quo clariorem iis, quæ antea de infinito diximus, lucem tradat. Sit progressio Geometrica continuo crescens, cujus primus sit terminus a , secundus b , denominator $\frac{b}{a}$, tertius erit $\frac{bb}{a}$, quartus $\frac{b^3}{a^2}$ & ita porro, ultimus denique sit t . Sit præterea summa progressionis per litteram s denotata, erit §. 184. *Elementorum Analys. Wolfianæ* $\frac{b}{a} = \frac{s-a}{s-t}$ atque a , b , t , datis, cognitus erit valor summæ $s = \frac{bt - aa}{b - a}$.

Si in casu speciali $a = 1$; $b = 2$; $t = 64$; erit tunc $s = 63$. Si vero in alio casu (reliquis manentibus iisdem) $t = 2^\infty$ hoc est potentia numeri binarii, cujus exponens rationis omni numero finito major est, erit tunc $s = 2^{\infty} + 1 - 1 = 2^{\infty} + 1$.

Siquidem -1 respectu quantitatis indefinite parvæ, sensibilibiter hanc diminuere non potest. Ergo hoc in casu summa omnium terminorum hujus progressionis Geometricæ æqualis est facto secundi in ultimum indefinitum: sed quis non videt loco binarii posse pro secundo termino quemvis alium numerum sumi 4. 8. 16. 32. & ita pro valore differente ejus etiam summam unius progressionis ab altera differre. Si deinde consideremus in alio casu, quænam sit expressio pro summa terminorum omnium, qui in progressionem Geometricam continuo decrescente procedunt, tum quidem si primus terminus iterum a , alter b , ultimus t , denominator $\frac{a}{b}$, summa terminorum s erit $\frac{a-s-t}{b-s-a}$ & summa $= \frac{aa-bt}{a-b}$. Sit nunc t , indefinite parva quantitas; nihilo æqualis est, & ita cum bt evanescat, expressio pro summa s erit $\frac{aa}{a-b}$. Si in casu speciali $a = \frac{1}{2}$ & $b = \frac{1}{4}$ erit $\frac{aa}{a-b} = 1$, sive summa omnium fra-

ctionum continuo Geometrice proportionalium, quarum prima est $\frac{1}{2}$, altera $\frac{1}{4}$ & ita porro: harum inquam fractionum summa unitatem æquat, aut ab illa non nisi fractione indefinite parva distat. Porro si seriem fractionum continuo Geometrice proportionalium consideramus, quarum singulorum numeratores unitates sint, denominator autem primæ fractionis singularum serierum unitate major est, quam denominator fractionis summam progressionis utcumque exprimentis: Omnium harum serierum ex fractionibus innumeris compositarum summæ pariter continuo Geometrice proportionatæ & a $\frac{1}{2}$ incipientes, unitatem iterum æquant: nam e. gr.

$$\left. \begin{array}{l} \frac{1}{3} + \frac{1}{9} + \frac{1}{27} \text{ \&c.} = \frac{1}{2} \\ \frac{1}{5} + \frac{1}{25} + \frac{1}{125} \text{ \&c.} = \frac{1}{4} \\ \frac{1}{9} + \frac{1}{81} + \frac{1}{729} \text{ \&c.} = \frac{1}{8} \\ \frac{1}{17} + \frac{1}{289} + \frac{1}{4913} \text{ \&c.} = \frac{1}{16} \end{array} \right\} = 1$$

Evidens ergo est ex his, quæ proposuimus exemplis, series dari ad indefinitos limites protractas, quarum summæ a quantitate finita non nisi particula omni exprimenda minore differunt, & proinde ipsi æquales habentur. Patet igitur indefinitas numerorum series & indefinitas Extensorum vel Mathematicorum vel Physicorum divisiones mente peractas inter se invicem non tantum differre, sed etiam talium summas, licet ex indefinitis numero particulis constent, finitam quantitatem æquare posse. Hoc etiam argumentum Em. DE POLIGNAC in *Anti-Lucretio* L. III. vers. 708 & sqq. proposuit.

*Nam quamquam in partes scindi queat infinitas
Materies, tamen haud dicas, equalia magnis
Corpora parva fore, ac nullo discrimine moles,
Ex infinitis quasi singula partibus æque
Constarent. Quamvis etenim sint Corpora nulla,
Quæ non dimidia semper decrescere possint
Parte sui, moles tamen haud scinduntur inæquas:
Parva sed in parvas, in magnas magna, resectis*

*Partibus, ut mancant eadem discrimina semper,
Quæ totis fuerant; nam semipede amplior ulna
Semiputata manet, veluti pede grandior ulna est.*

Ad argumenta contra divisionem Extensi indefinitam proposita ea etiam pertinent, quibus motus præcipue possibilitatem ZENO ELEATES impugnavit, & quæ apud *Aristotelem Phys. L. VI. cap. 9.* legimus, quorumque præcipuum *Achillem* vocavit, cujus summa in hoc consistit: quod testudo tardissime procedens nunquam ab Achille velocissime insequenti attingatur. Hoc argumentum huic saltem fundamento innititur, quod in continuo dentur partes actu infinitæ & quod illud, quod ex infinitis multitudine particulis constat, finito æquale esse non possit, quibus objectionibus supra respondimus. Alia similia argumenta BAYLE in *Dict. Histor. & Critiquæ* T. IV. p. 540. & seqq. sub titulo ZENON D'ELE'E contra divisibilitatem extensi offert.

Alii hoc argumento indefinitam Extensi divisibilitatem infringere voluerunt, quod numerus particularum, in quas corpus mente dividatur, vel par vel impar esse debeat. Cum vero par & impar numeri necessario finiti sint ex pari vel impari partium numero, infinitæ divisionis possibilitatem negarunt. Quod argumentum apud CLERICUM *Phys. L. V. cap. 4.* legitur. Respondemus autem par & impar numeros tantum finitos, non vero quantitates magnitudinis indefiniendæ & indefinitæ spectare, quippe quarum valor ab unitatibus vel additis vel subtractis non amplius ad sensum alteratur.

Tandem etiam ea proponimus argumenta, quæ ACHARDUS *Acad. Reg. scient. Berol. 1743. p. 143.* inseruit, quibus cum infinitum Mathematicum destruere tentavit, simul etiam indefinitam Extensi divisibilitatem aggressus est. Dicit I^o. quantitatis nomine venire, quidquid augeri minuique potest. Augmentum vero decrementumque, quorum idea ab idea quantitatis separari nequeat, re ipsa ostendere, quantitatem nullo modo infinitam esse posse: Quod quidem facile concedimus, si de absolute infinito sermo esset, quod num in rebus contingentibus existere possit, & utrum ejus idea quodammodo formari possit, acutioribus ingeniis inquirendum relinquimus. Sed quod quantitates indefinitæ magnitudinis aut parvitatibus

cogitari possint, antea fusius exposuimus. Quantitatis ergo idea indefinito ejus augmento decrementove non contradicit. Quantitas enim omnis ex sua natura augmenti decrementique capax naturam aliam non induit, sive nunc illud augmentum, vel decrementum patiatur, sive non. Manet ergo quantitas, postquam has affectiones accepit, denuo augeri minuique potest, semperque hac facultate gaudet; ergo sine fine: Quod autem secundum argumentum attinet; ex quo ACHARDUS contra divisibilitatem indefinitam disputat, circa hoc potissimum versatur; quod nimirum numerorum naturalium progressio infinita dicatur, quia extremus ejus terminus nec attingi, nec finito aliquo numero exprimi possit. Quæritur igitur: quinam sit ille limes, ad quem finitum desinit, & a quo infinitum incipit? Terminus enim immediate ultimum præcedens infinitus non est, cum ultimo sit minor, nec extremus qui illud saltem ex suppositione dicitur, reipsa ultimus est, cum alius hoc major cogitari possit. Interim tamen & huic argumentationi eisdem respondemus, quæ ad primam diximus: nempe hic nos non de infinito absoluto, sed de indefinito loqui. Hoc respectu penultimus & singuli, qui huic & innumeris antecedentibus præcurrunt, termini sunt æque indefiniti ac ultimus suppositus, quia numero finito, nec hic, nec ille, nec unusquisque eorum exprimi possunt, atque ita limites, ad quos perveniunt finitæ, & a quibus incipiunt indefinitæ quantitates, assignari nequeunt.



